

明

史

明史卷十二

本紀十二

英宗後紀

天順元年正月壬午帝復於位是時居南宮七年矣  
景帝伐宮樹錮其門令不得接臣民帝亦安之會景  
帝疾甚中外皆望復故太子而武清侯石亨與都督  
張軫中官曹吉祥謀以為不若迎帝復辟可以有功  
功乃與左副都御史徐有貞定計是日昧爽以兵迎  
于南宮自東華門入御奉天門百官起居退御文華  
殿命徐有貞以原官兼翰林學士入閣預機務召陳  
循等共草制宣諭羣臣至日午御奉天殿即位遂執

于謙王文於班內并中官王誠舒良等俱下詔獄太  
常卿許彬為禮部右侍郎兼翰林學士入閣預機務  
甲申大理寺卿薛瑄為禮部右侍郎兼翰林學士入  
閣預機務丙戌詔曰朕昔嗣承大統十有四年民物  
康阜北寇告變朕以宗社生民之故親率六師禦之  
命庶弟郕王監國不意屬車駭亂乘輿被遮文武羣  
臣既立皇太子而奉之乃監國之人遽攘大位及天  
既悔禍也先革心奉朕南還既無復辟之意反為幽  
閉之謀旋廢皇儲爰立己子惟天不佑未久而亡杜  
絕諫諍失德猥多以致得疾遂用沉篤朝政不臨人

心斯憤令朕為公侯文武六軍萬姓所擁戴請命皇  
太后祇告天地社稷宗廟復即皇帝位其改景泰八  
年為天順元年大赦天下論迎駕功封石亨忠國公  
張軫太平侯張輓文安伯楊善興濟伯丁亥殺兵部  
尚書于謙大學士王文及司禮太監王誠舒良張永  
王勤籍其家陳循俞士悅江淵等謫戍邊蕭鎡商輅  
等黜為民己丑再論迎駕功封孫鏗懷寧伯董興海  
寧伯將士奪門者進三級守門者一級凡三千餘人  
辛卯罷諸巡撫提督官工部左侍郎趙榮為尚書王  
直致仕壬辰命吏部具于謙王誠等黨人及邸府舊

僚姓名以聞榜其罪示天下癸巳胡濙致仕甲午誅  
前昌平侯楊俊二月乙未朔廢景泰帝為郕王遷之  
西內黜郕府舊僚禮部尚書掌太常寺章文等有差  
戊戌命會試取士毋限額庚子高穀致仕南京副都  
御史軒輓為刑部尚書汰部院諸臣調戶部尚書張  
鳳左都御史蕭維楨于南京癸卯吏部右侍郎李賢  
兼翰林學士入閣預機務殺都督同知范廣戊申黜  
右都御史李實為民安遠侯柳溥等奏破廣西蠻賊  
壬子王驥兼兵部尚書掌部事癸丑郕王薨戊午方  
瑛石璞等奏破苗寇詔璞還朝是月免蘇州鳳陽淮

安廬州河間保定去年災賦三月己巳皇太子復于  
位封皇子見濟德王見澍秀王見澤崇王見浚吉王  
封徐有貞武功伯癸酉免畿內去年災賦乙亥大賚  
文武軍民庚辰策試天下貢士賜黎淳等二百九十  
四人進士及第出身有差命石亨充總兵官勦寇延  
綏辛巳召致仕右都御史沈固為戶部尚書壬午楊  
善兼禮部尚書耿九疇為右都御史丁亥賑山東饑  
夏四月甲午朔以災異數見躬禱于上帝命廷臣條  
列軍民利病以聞丁酉方瑛破銅鼓藕洞諸苗苗賊  
悉平丙午命內閣會廷臣詢察天下監司知府丁未

久旱命中外慮囚戊申禱雨癸丑罷團營甲寅襄王  
瞻塏入朝乙卯寇犯寧夏是月免浙江及永平去年  
災糧孛來遣使入貢都督馬政報之使者至高山站  
殺護卒百人掠馬及兵仗以去五月丙寅孛來使再  
至留使臣馬政不遣賜教責之辛未孛來移駐近塞  
詔柳溥率兵巡邊甲戌放教坊樂工樂婦四百八十  
餘人還鄉丙戌起致仕左都御史馬昂撫安山西軍  
民己丑發帑銀賑山東饑壬辰免河南去年災糧  
是月下御史張鵬楊瑄等于獄六月甲午下耿九疇  
及副都御史羅綺于獄己亥下徐有貞李賢于獄是

日大風雷雨拔樹發屋電擊毀奉天門東吻諭羣臣  
修省庚子出有貞賢綺為叅政九疇布政使御史盛  
顛等十二人為知縣戊楊瑄張鵬于邊通政叅議兼  
侍讀呂原入閣預機務王驥致仕朝朔望壬寅薛瑄  
致仕癸卯修撰岳正入閣預機務甲辰留李賢為吏  
部右侍郎乙巳殺巡撫貴州右副都御史蔣琳戊申  
兵部右侍郎陳汝言為尚書丙辰免大名去年災賦  
秋七月乙丑復逮徐有貞下獄丙寅夜承天門災丁  
卯躬禱于南郊引罪自責遣大臣徧告太廟社稷城  
隍諸神戊辰諭廷臣修省庚午進李賢吏部尚書兼



翰林學士復入閣預機務調許彬南京禮部辛未岳  
正謫欽州同知癸酉大赦天下丁丑左副都御史寇  
深為左都御史戊寅軒輓致仕癸未放徐有貞于金  
齒戊子大賚諸邊軍士八月甲午以彗星屢見躬禱  
于上帝乙未免武昌黃州長沙永州去年災糧庚申  
刑部左侍郎劉廣衡為尚書是月楊瑄張鵬遇赦還  
復戍南丹九月甲子太常少卿兼侍讀彭時入閣預  
機務壬午刑部右侍郎周瑄賑順天河間饑米二十  
四萬餘石給牛種各以萬計庚寅岳正下獄戍肅州  
冬十月丁酉賜王振祭葬丙辰釋建文帝之子文圭

及其母楊氏等十八人居鳳陽有司月致廩餼婚娶  
出入聽自便勅廷臣曰建庶人幼累于前人拘幽至  
今朕方欲使羣生咸得其所况周親哉已作室鳳陽  
今貸此遺孤俾往居之厚加賚予以安其生仍聽婚  
娶用行後嗣庶使天下知朕親親焉丁巳詔京官三  
品以上子孫方許入監仍責令由科目進戊午勅工  
部建石亨第十一月庚午馬昂還理院事命僉都御  
史王儉賑徐饑甲戌田州土酋呂趙掠南丹據向武  
地命廣西總兵官朱瑛率土官岑瑛討之己丑免濟  
南青州東昌災賦是月賜天下寺額凡四十所十二

月壬辰封太監曹吉祥從子左都督欽為昭武伯戊戌免大同災糧辛丑柳溥充總兵官率師備甘涼邊壬子禱雪于宮中分遣大臣徧祈百神

二年春正月辛酉陳汝言有罪下獄籍其家己卯上皇太后尊號辛巳頒優老之詔於天下二月癸巳馬昂為兵部尚書壬寅免鳳陽淮安徐寶坻去年災糧戊申開雲南福建浙江諸銀場遣內臣於雲南收市珍寶三月辛亥禱雨夏四月戊午朔禱雨乙丑皇太子出閣講學庚午復設巡撫官乙酉勅曰京師天下之本貴戚近臣四方所視倣貴近之不肅其何以示

天下勲戚文武大臣有不遵禮度藏匿奸人占軍民  
田侵牟公私利及詭名中鹽虧損正課者聽自首革  
正匿不言者事覺罪不赦五月丁亥朔楊善卒壬寅  
處士吳與弼聘至命為左諭德國辭不拜六月乙亥  
以山東歲荒遷東昌諸府降丁於南京秋七月辛卯  
吳與弼辭歸賜璽書獎厲仍遣行人送之革寧王奠  
培護衛癸卯石彪充總兵官左都督劉深副之率師  
禦寇寧夏八月戊辰孛來犯鎮番九月乙酉朔賚大  
同宣府將士冬十月丁巳劉廣衡罷癸亥山東左布  
政使陸瑜為刑部尚書壬午陳友充總兵官勦寇寧

夏十一月庚子命石亨所募報効子弟六千人為忠義營戊申禱雪甲寅免濟南東昌兗州青州災糧十二月庚辰罷舉經明行修賢良方正之士是月寇犯遼東廣西賊流劫廣東

三年春正月乙未賜王振祠額曰旌忠甲辰寇犯安邊營石彪楊信等敗之斬其酋鬼赤力二月甲子免真定廣平去年災糧丁卯遣御史呂洪同中官采珠于雷州廉州乙亥市耕牛給甘涼諸衛被寇者夏四月壬子朔巡撫兩廣僉都御史葉盛破瀧水猺賊禽賊首鳳弟吉送京師壬戌方瑛等進勦東苗克之獲

賊首千把猪等送京師伏誅辛未廣西流賊掠桂林  
梧州潯州轉掠肇慶與廣東徭獍攻陷開建詔守臣  
合兵討之五月丁亥大同有警勅宣府總兵官楊能  
往援都督顏彪率京軍赴之六月辛酉命巡撫官仍  
以八月赴京議事戊辰免祥符諸縣去年災糧七月  
癸未免武陵諸縣去年災糧八月庚戌朔定遠侯石  
彪有罪下詔獄己未勅曰太祖高皇帝立綱陳紀董  
正百官作鐵榜戒功臣小大罔有不肅近朝臣多違  
禮法好締私交甚至阿附勢要漏泄機事交相構結  
為弊百端如定遠侯彪謀鎮大同事覺被劾輒有近

侍潛報官方不正乃至斯此而不禁何以爲治自  
今文武大臣無故不得相往來給事中御史及錦衣  
官不得與文武大臣交通各衛指揮以下非出征不  
得入公侯門違者如鐵榜論罪勅鎮守浙江江西福  
建中官選民間婦女知書者充六尚局女官戊辰治  
石彪黨逮大同都指揮朱諒等七十六人乙亥賑湖  
廣災仍免其稅糧丙子免河間災稅己卯命石亨親  
屬以奪門功擢者俱黜之九月戊戌石亨黨吏部侍  
郎孫弘等貶謫有差是月免濟南青州東昌太原平  
陽去年災稅冬十月庚午石亨有罪聞住諸冒奪門

功遷者許自首更正除其罪敢隱者坐之于是自首者四千餘人是月初命法司會廷臣于霜降前錄重囚自是歲以為常十一月癸巳湖廣旱饑盡出官庫銀易米以賑且免其稅糧軍民納米授散官有司納米免赴部考滿庚子增建南內宮殿成命中使陪內閣儒臣遊宴癸卯免真定去年災稅

四年春正月癸卯石亨謀反下詔獄籍其家二月辛亥勅戒文武羣臣宥石亨黨不問壬子撞賊陷梧州癸丑沈固致仕癸亥石亨死於獄丁卯湖廣左布政使蕭昺為禮部尚書石彪伏誅丙子巡撫山東副都



御史年富為戶部尚書三月戊寅朔策試天下貢士  
賜王一夔等一百五十六人進士及第出身有差壬  
午廣西兵討田州反者呂趙誅之是月免蘇州開封  
諸府去年災賦夏四月戊申罷三品以上子孫奏請  
入監已酉分遣中官督浙江雲南福建四川銀課壬  
子襄王瞻塏來朝五月壬午免廣平杭州諸府去年  
災糧癸巳申自宮之禁丙申命景泰間所賜羣臣歷  
代君鑑悉送還官己亥罷遣中官督蘇杭織造六月  
癸亥免常德諸府去年災賦秋七月庚辰遣使分捕  
逃匠辛卯淮堤決壞鳳陽城沒軍民田廬遣使賑恤

八月甲辰朔免武昌諸府水災稅糧仍命所司賑之  
戊午勅撫按官所在察視災傷議蠲賑己未禁緝事  
官校擾民捕詐偽者甲子孛來三道入寇命大同總  
兵官李文迎禦宣府總兵官楊能集兵應援辛未近  
畿民訛言寇至皆奔避遣御史及錦衣官各二人撫  
安之九月丁丑新作西苑成帝偕文武大臣遊賞彌  
日庚辰寇圍大同右衛庚寅撫寧伯朱永都督白玉  
鮑政率京軍巡宣府邊是月免河間南昌諸府去年  
災糧冬十月甲子閱騎射于西苑總兵官及騎射優  
者賜鈔有差十一月癸酉朔改禮部尚書蕭昺于南

京以南京吏部侍郎石瑁代之丁酉復閱騎射于西苑試諸營隨操武臣仍賜鈔有差閏十一月丁巳夜以月食失占召閣臣李賢等論曰月食而欽天監失占曠職甚矣每聞禮部侍郎掌監事湯序專隱蔽災異遇變必曲為之說占苟不祥則削之其有吉徵即備錄以聞貢諛懷好不恭天戒罪可容乎其下之獄于是降序太常少卿仍理監事己未幸鄭村閱馬庚申免真定鳳陽災稅

五年春二月己卯賑開封饑甲午李來寇莊浪丙申命顏彪充總兵官率軍征大藤徭賊是月免山東及

廣平災糧三月壬子免蘇州諸府去年災糧丙寅湖  
廣總兵官李震破諸徭僮會廣西軍夾攻十八團諸  
徭克之夏四月癸未免真定去年災糧辛卯西安旱  
疫遣使祭西嶽癸巳孛來寇邊命兵部右侍郎白圭  
督陝西諸軍禦之五月丙午寇犯宣府是月免河南  
江西去年災糧六月辛未免杭州嘉興湖州寧波去  
年災糧壬午寇入河西副總兵仇廉等敗績命馬昂  
總督軍務孫鏜充總兵官率京軍往擊之丁亥命凡  
告訐採訪事重者奏聞餘付巡按御史及所司鞠之  
勿逮捕壬辰以去年水災罷採取花木鳥獸及清匠

刷卷諸事秋七月己亥朔以曹欽犯法勅戒武臣庚子總督京營太監曹吉祥及其從子欽反殺左都御史寇深錦衣指揮逮杲縱火攻東西長安門孫鏗集兵與戰欽敗死壬寅命撫諭京城及保定諸降丁凡為賊脅誘者皆宥之癸卯曹吉祥伏誅夷其族丙午治曹欽黨湯序等皆伏誅丁未免南畿去年災賦庚戌大赦天下詔言官直言辛亥大理寺卿李賓為右都御史癸丑削曹吉祥所部冒迎駕功擢者戊午守備蘭縣右都督馮宗為副總兵代孫鏗西征辛酉李來三上書乞和命都指揮詹昇竇顯賁璽書諭降賑

在浪被寇者八月辛巳命自今舉官錄囚內閣皆勿  
與九月癸丑以兩廣用兵許所在軍民輸米得投散  
官乙卯崑山嘉定崇明上海潮溢溺軍民萬二千餘  
人命所司賑恤冬十月壬申以西邊用兵開河南山  
西陝西納馬側辛卯詹昇等至塞外孛來聽命遣使  
來受約設飯堂于南京以濟孤貧十一月癸丑復設  
提學官十二月戊子陳汝言死于獄是月免蘇州松  
江青州萊州災糧

六年春二月癸酉孛來使還賜敕諭之令約束他部  
毛裏孩等毋寇邊三月癸卯年富以父喪去詔起復

乙卯遣都指揮馬鑑等齎銀幣往弗提衛黑龍江購  
海東青夏五月壬寅詔在外諸司毋增置刑具松潘  
副總兵許貴破欽州蠻己未免西安諸府去年災糧  
六月戊辰准王祁銓來朝秋八月癸亥朔賑廣州諸  
府饑九月乙未皇太后崩癸丑禁總兵官理民訟冬  
十一月庚申呂原卒十二月癸酉修曲阜孔子廟甲  
申石瑁卒

七年春正月壬子吏部左侍郎姚夔為禮部尚書丙  
辰洪江苗賊苗蟲蝦等叛命湖廣貴州會師討之二  
月壬戌詹事陳文為禮部右侍郎兼翰林學士入閣

預機務癸酉賑甘肅饑給糧種三月壬寅下詔寬恤  
罷諸銀場辛亥兵部右侍郎白圭為工部尚書夏四  
月壬午逮巡按宣大御史李蕃下詔獄荷校長安左  
門數日死癸未賑西安諸府饑丙戌遣中官督蘇杭  
織造五月丙申裕州知州秦永昌坐貪暴為緝事者  
所發逮至京伏誅籍其資陳于廷以示羣臣逮巡按  
御史吳玘等罪之六月丁卯逮巡按山西御史韓祺  
至京師荷校長安左門數日死秋七月庚戌免陝西  
去年災糧閏七月甲戌追上宣宗廢后胡氏尊謚修  
治陵寢八月己丑鳳陽揚州淮安徐久雨傷稼遣使



賑之九月甲戌以廣西徭賊屢犯廣東命總兵官陳  
涇率衆會討己卯四川蒲江賊悟真等流劫榮昌遂  
寧銅梁諸縣命所在官軍討之甲申免長沙諸府災  
賦冬十月庚寅大理瀾滄盜起命總兵官沐瓚討之  
丁酉賑西安諸府饑米一百八十三萬餘石丁未命  
巡撫廣西僉都御史吳禎節制兩廣諸軍赴廣東討  
賊十一月癸酉大藤峽賊襲陷梧州是月季震等破  
苗賊於赤谿浦洞十二月辛卯刑部尚書陸瑜侍郎  
周瑄陳信下獄尋釋之是月免真定應天諸府災賦  
八年春正月乙卯帝不豫己未命皇太子視事文華

殿己巳大漸始命罷殉葬庚午帝崩年三十有八二月乙未上尊諡曰法天立道仁明誠敬昭文憲武至德廣孝睿皇帝五月葬裕陵帝嫺習騎射時御琴書自奉儉約宮壺嚴於外廷臨朝淵默近侍莫窺其際百司章奏親自裁決無所旁落敬天勤民久而弗替事母后誠孝篤至待宗室戚畹恩義兼施一代稱英主焉

論曰帝不幸身丁多難兩載北庭七年南內艱辛困苦若古未有聞焉以故復辟之後綜攬明察內外罔敢忤其紀斯則動心忍性之明驗也惟是邠王之惡終

少保之疑獄既已灼知其枉矣而釐而正之必以待  
諸後人抑獨何與嗚乎改過不吝誠未易言也已

明史卷十三

本紀十三

憲宗

憲宗諱見深英宗長子也英宗北狩皇太后命立爲皇太子景泰三年廢爲沂王天順元年復立爲皇太子八年正月庚午英宗崩乙亥卽皇帝位詔赦天下以明年爲成化元年賜天下田租三之一罷浙江江西福建陝西臨清內外鎮守官諸邊鎮守內官正統間所無者悉罷之緝事官校及下番使者皆召還其他蠲逋養老如常制二月庚子始以中旨授官自是傳奉不絕三月甲寅朔尊皇后爲慈懿皇太后生母

貴妃周氏爲皇太后戊午放宮人還家丙寅毀錦衣  
新獄癸酉詔吏部偕內閣九卿考覈天下方面官乙  
亥勅禮部曰京師寺院已多而內臣及勢力之家增  
修不已妄求賜額名爲爲國祈福實以生災自今其  
禁之戊寅復立團營夏四月乙巳年富卒壬子發帑  
銀七十六萬餘兩犒邊軍五月丁巳以京師大風雨  
雹爲災勅羣臣修省庚申葬英宗皇帝於裕陵庚午  
始視朝秋七月壬申立皇后吳氏八月辛卯改兵部  
尚書馬昂於戶部以總督漕運副都御史王竑代之  
巡撫宣府副都御史李秉爲左都御史癸卯廢皇后

吳氏冬十月壬辰立皇后王氏癸巳賜宣府大同軍士皮服甲辰定武舉之制十二月壬辰始命道士孫道玉爲真人甲辰詔京官除贓罪外他所犯悉除之是年兩廣四川反者徃徃攻陷城邑殺掠官民兩畿之間羣盜亦所在劫掠道路爲之不通

成化元年春正月甲子都督同知趙輔充總兵官僉都御史韓雍贊理軍務討兩廣叛蠻癸酉開輸米事例於兩廣二月壬午弗提衛進海青却之甲午耕籍田乙巳勅王竑簡閱十二團營三月庚戌四川山都掌蠻作亂丁巳幸太學釋奠於先師孔子戊午免延

安災賦丙寅作承天門夏四月丁丑朔減曲阜孔氏  
子孫田租三之二五月辛酉京師大雨雹損稼壬戌  
帝減膳避正殿諭羣臣修省秋七月己酉免天下軍  
衛屯糧十之三是月賑兩畿浙江南陽荊州襄陽饑  
八月丁丑遣工部侍郎沈義往保定諸府僉都御史  
吳琛往淮安諸府巡視災荒便宜賑恤辛己詔所在  
民饑溺死者官爲收瘞庚寅河套賊毛里孩犯邊是  
月天下奏報水災州縣百四十九月己未王竑致仕  
丙寅發帑銀賑鳳陽徐饑冬十月庚寅免河間災賦  
壬辰兵部左侍郎王復爲尚書十一月己酉免保定

永平水災稅糧十二月己卯延綏被寇命楊信總制  
大同宣府陝西軍馬馳往禦之壬辰禱雪戊戌勅除  
內外文武官過名癸卯荆襄賊起命撫寧伯朱永充  
總兵官工部尚書白圭提督軍務率師討之是月趙  
輔韓雍大破大藤峽徭賊

二年春正月戊申復罷團營己巳命九卿舉堪任布  
按二司者關納米例於荆襄諸府二月癸未命禮部  
左侍郎鄒幹巡察畿民疾苦己丑寇犯保德癸巳開  
納米例於榆林三月壬寅朔策試天下貢士賜羅倫  
等二百五十八人進士及第出身有差己酉李賢以



父喪去詔起復辛亥冊萬氏爲貴妃乙卯朱永白圭  
大破荆襄賊劉通于南漳癸亥命禮部鬻僧度牒以  
賑饑民間三月癸酉發淮安徐州倉糧四十萬石賑  
鳳陽諸府饑甲申勅總兵官李震討靖州叛苗癸巳  
朱永白圭擊劉通擒之其黨石龍遁去丁酉賑淮安  
徐饑夏四月乙丑趙輔韓雍平兩廣賊五月丙申鄒  
幹奏賑畿輔饑米二十六萬餘石給牛種四萬餘戶  
六月乙巳免天下今年屯糧十之三己酉石龍轉掠  
四川辛亥命閒住翰林院學士倪謙入閣辦事既而  
寢之壬子楊信充總兵官討河套寇秋七月丙子寧

夏被寇辛巳封皇弟見治爲忻王見沛徽王壬午彭  
時歸省庚寅申戒出使王府官毋受宴餽戊戌毛里  
孩寇固原八月戊申命王復李秉分飭邊備丁卯卹  
故兵部尚書于謙是月寇犯延綏寧夏九月己丑免  
太原大同災糧丁酉李秉總督遼東軍務冬十月丁  
未朱永白圭討石龍擒之十二月甲寅李賢卒丙辰  
太常少卿兼侍讀學士劉定之入閣預機務是月斷  
藤峽餘賊復起

三年春正月戊子勅朝鮮國王李瑤毋獻異物丙申  
命朱永充總兵官統京軍三萬人會楊信勦寇二月

丁酉朔毛里孩三上書求貢許之己亥海西諸部入  
鴉鵝闕抄掠辛丑大同被寇甲辰彭時還朝命戶部  
尚書馬昂副都御史林聰偕太監懷恩清覈京營軍  
士丁巳李震破銅鼓諸苗三月戊辰復以商輅爲兵  
部左侍郎兼翰林學士入閣預機務己巳大同被寇  
戊寅遼東被寇辛己復開浙江福建四川雲南銀礦  
以中官領之夏四月己亥林聰爲右都御史以四川  
地屢震勅戒文武將吏遣使祭境內山川勅天下鎮  
巡諸臣撫卹流民復業者給牛種乙己錄囚癸丑復  
立團營改白圭於兵部王復於工部五月壬申以宣

府大同威懷朔州地震勅鎮巡官嚴邊備庚寅免任  
丘災糧六月辛酉命襄城伯李瑾充總兵官兵部侍  
郎程信提督軍務統四川貴州兵討山都掌蠻秋七  
月辛巳以雷震南京午門遣使祭南京郊壇及諸陵  
壬午王翱致仕乙酉勅曰頃者地載失寧南都復有  
雷震之異朕齋心求過冀弭災變咨爾在廷實共天  
職得無有竊位蔽賢徇私懷利未達聽聞者夫怠而  
能勉過而能改知止足而能退朕所與也以毗朕志  
以回天意庶君臣交修之道於是諸大臣皆辭位不  
許停河南一切採辦九月辛未賑湖廣江西饑冬十

二月辛丑李秉爲吏部尚書杖編修章懋黃仲昭檢  
討莊昺於闕下謫其官甲辰留江西應運糧十九萬  
石賑饑民是月程信李瑾擊山都掌蠻大破之

四年春二月壬辰朔免高郵去年災糧三月甲申詔  
中外勢力之家不得奏乞田土是月免應天淮安安  
慶及湖廣災賦夏四月丙午以京師旱霾遣使祭告  
山川庚戌封西僧劄巴堅叅爲大悟法王丁巳慮囚  
五月丙寅陳文卒甲戌詔順天府存恤窮民癸未遣  
使錄天下罪囚是月陝西開城賊滿俊作亂六月丙  
午免南昌諸府災糧辛亥總兵官寧遠伯任壽巡撫

都御史陳价討滿俊敗績甲寅慈懿皇太后崩秋七月癸酉副都御史項忠總督軍務都督同知劉玉充總兵官討滿俊是月寧夏總兵官廣義伯吳琮會陳价任壽討滿俊敗績八月辛丑免建德東流及通災賦壬子開陝西納米例九月庚申葬孝莊皇后辛酉賑陝西饑壬申以地震星變勅羣臣修省癸酉馬昂致仕冬十月己丑項忠等討滿俊敗之甲午賜京師窮民布己亥吏部考察內外聽選官罷者三百三十餘人甲寅戶部左侍郎楊鼎爲尚書十一月壬戌遼東被寇項忠擊滿俊禽之十二月丁酉賑荊州襄陽

流民

五年春正月乙亥李秉罷辛巳吏部左侍郎崔恭爲  
尚書是月延綏被寇二月庚寅免瀘州及滎昌諸縣  
災賦庚戌衍聖公孔弘緒有罪詔逮治寬其桎梏甲  
寅開中淮浙鹽於荆襄南陽賑濟流民三月己亥策  
試天下貢士賜張昇等三百四十八人進士及第出  
身有差夏四月戊午真人張元吉有罪下獄免死戊  
肅州庚午大同被寇五月乙酉崔恭以憂去辛丑命  
禮部左侍郎萬安兼翰林學士入閣預機務六月庚  
申改姚夔于吏部以南京禮部尚書鄒幹代之辛酉

慮囚秋八月辛酉劉定之卒冬十一月延綏被寇十二月辛亥禱雪丙寅免順天永平水災稅糧甲戌除內外官過名是冬阿羅出犯河套

六年春正月庚子以湖廣地震遣使祭境內山川壬寅巡撫大同右副都御史王越擊寇於厓窰川丁未揚信禦寇于胡柴溝並以捷聞二月辛未命刑部侍郎曾鞏等巡視浙江河南福建四川及大名諸府考察官吏訪問軍民疾苦壬申勅曰迺者自冬徂春災異洊臻雨雪不降豈德不敏政多闕與抑羣臣弗克竭誠盡公輔不逮也朕將率廷臣禱于山川其各洗



濯乃心凡政事未善刑罰失中及有惠利可興舉寃抑當伸理者條具以聞於是姚夔等皆辭職帝曰本勅廷臣共修省合辭求退豈交修之道哉不許丁丑禱雨于郊壇戊寅賑廣西饑三月壬寅命朱永充總兵官太監傅恭頤恒監督軍務王越叅贊軍務往延綏備寇是月免南畿湖廣山東福建及汝平遙災賦夏四月免應天太平杭州湖州水災稅糧五月己丑以山東旱遣使禱于東嶽東鎮東海丙申賑山東河南饑甲辰詔建佛閣于西山己而罷之丁酉王越等敗寇于延綏東路是月免陝西雲南災賦六月丁己

朱永等敗寇于雙山堡甲子罷方面官保舉停京官  
今年俸鈔庚午京師大雨水賑貧戶壞廬舍者米一  
石死傷者二石秋七月己卯皇子祐愷生丙戌命右  
都御史項忠吏部右侍郎葉盛賑畿輔饑民是月免  
南畿四川災賦八月辛亥賑山西饑免今年稅糧癸  
丑詔曰災沴洊至畿內尤劇三時不雨一雨累旬旱  
澇相仍民食乏絕循省厥咎在予一人百姓何辜罹  
茲艱厄有司其釋輕繫蠲租稅諸逋負勿責償採辦  
未入者已之免天下今年戶口鹽鈔被災甚者賑之  
荆襄流民有司謹視毋令失所九月乙酉南京兵部

尚書李賓爲左都御史己丑賜京師貧民布己亥發  
倉米五十萬石平價市之冬十月己酉免河南災稅  
辛亥發近畿倉糧減價糶之丁巳運德州倉米賑青  
饑十二月己酉禱雪庚戌遣使分賑畿輔丙辰以畿  
內水澇遣使祭北嶽北鎮

七年春正月辛巳開中長蘆鹽於畿輔陝西被災州  
縣以賑饑民命京官五品以上及科道各舉堪任州  
縣者一人二月乙卯免福安諸縣水災稅糧三月壬  
寅免滌全椒諸州縣災糧夏四月辛酉以災疫流行  
遣使祭告山川羣神己巳慮囚五月辛巳詔京城外

置義塚收瘞死者秋七月甲午項忠奏平荆襄賊八月甲辰山東杭州嘉興湖州紹興大水命賑之貸以牛種九月丁酉林聰出撫大同閏九月己未以浙江潮溢漂沒民居鹽場遣工部右侍郎李顯往祭海神修築堤岸冬十一月丙午免鳳陽徐災稅甲寅立皇子祐極爲皇太子大赦天下辛酉復荆襄流民還業者三年十二月甲戌以彗星見引咎自責諭羣臣修省條舉時政闕失民生利病以聞壬午復以星變避正殿撤樂御奉天門聽政癸未召朱永還命王越總督延綏邊兵辛卯慮囚是月寧夏慶陽被寇四川盜

起

八年春正月乙巳募民納馬癸亥皇太子薨是月延  
綏固原平涼被寇三月辛亥策試天下貢士賜吳寬  
等二百五十人進士及第出身有差夏四月癸酉以  
京師旱霾運河水涸遣使禱于郊社山川及淮瀆東  
海之神癸未慮囚丁亥遣使分錄天下罪囚五月戊  
申免陝西山西河南夏稅十之二癸丑命趙輔充總  
兵官與王越赴延綏禦寇甲寅免嘉定諸縣去年災  
糧戊午進項忠左都御史秋八月寇犯寧夏深入環  
慶固原九月庚戌賜京縣竄民布冬十月壬午開浙

江納米例備賑十一月己酉命劉聚代趙輔禦寇癸丑免順德災糧戊午減光祿寺明年供應十之一十二月庚午免真定災賦癸酉賑京城流民

九年春正月辛酉賑順天饑是月土魯番速檀阿力破哈密據之二月庚午姚夔卒癸未以陝西災遣使祀西嶽西鎮并祭將士陣亡人民被戮者三月己亥吏部左侍郎尹旻爲尚書壬寅減雲南銀課之半丙辰禱雨庚申賑畿內山東饑是春免兩畿山西湖廣及海康諸縣災賦夏四月戊辰以山東旱免今年稅糧遣使禱于嶽鎮東海瘞京畿棄骸壬午幸西苑閱

公侯以下騎射是月福餘三衛寇遼東總兵官歐信  
擊敗之五月丁酉發德州倉粟三萬餘石于河間減  
價糶之丙午復發粟賑山東饑分處流民於河南給  
粟贍之六月壬申賑山西饑己卯以陝西凶荒免今  
年夏稅及宿負秋七月壬辰遣都督同知李文右通  
政劉文往甘肅規復哈密壬子賑西安延安流民甲  
寅免彰德衛輝去年災賦八月丁卯陸瑜致仕大理  
寺卿王概代爲刑部尚書丁丑白圭起復復賑山東  
饑募軍民納銀授散官備賑九月辛卯鎮守浙江中  
官李義杖殺寧波衛指揮馬璋詔勿問燕子王越等

襲寇於紅鹽池大破之丙辰免大名災稅冬十月乙丑慮囚壬午免平陽災稅十一月甲午寇犯秦安會寧諸州縣丁酉復閱騎射于西苑甲寅免河間災糧乙卯鬻河東鹽四十萬引賑山西饑十二月戊寅停徵民間孳牧馬辛巳湔除內外官過名

十年春二月丙辰朔罷巡撫官赴京議事三月免武昌諸府徐和諸州去年災賦夏五月戊申禁私藏妖書讖緯者是夏免南畿山西陝西及湖州災賦秋七月免南昌大同災賦八月辛卯命都督同知趙勝充總兵官統京軍討亂加思蘭壬子王概卒九月乙卯



免蘇松諸府災糧辛巳給京師窮民布冬十月己丑  
命哈密都督罕慎領衛事駐苦峪城十一月丁卯項  
忠爲刑部尚書壬申禱雪是月免河南浙江災賦十  
二月己丑罷寶慶諸府採金辛丑白圭卒丙午改項  
忠於兵部以巡撫大同右都御史董方爲刑部尚書  
十一年春正月癸酉詔給哈密衣糧穀種二月甲申  
申禁酷刑乙巳命左都御史王越同李賓理院事兼  
提督團營三月庚戌朔策試天下貢士賜謝遷等二  
百九十七人進士及第出身有差辛未彭時卒是月  
免順天真定保定廬州鳳陽徐去年水災稅糧夏四

月乙酉命吏部左侍郎劉珣禮部右侍郎劉吉並兼翰林學士入閣預機務壬辰乾清宮門災己亥錄囚五月免應天武昌漳州諸府去年災賦六月免鳳陽揚州廬州平陽諸府災賦秋七月庚申朶顏三衛請開廣寧馬市不許八月辛巳浚通惠河壬午免太原及潞沁遼三州去年災賦辛丑詔諭安南國王黎灝歸占城國土冬十月庚辰賜京師窮民布癸卯免順天災糧十一月癸丑立皇子祐樞爲皇太子大赦天下十二月壬午禱雪戊子復邲王帝號丁酉申禁男子自宮者

十二年春二月辛卯免南陽彰德災傷逋賦甲午詔  
羣臣修省是月滿都魯自稱可汗訖加思蘭自稱太  
師三月壬子減內府供用物癸丑勅巡撫四川右副  
都御史張瓚捕播州苗賊壬戌李震大破靖州苗賊  
夏五月庚申慮囚丁卯命左副都御史原傑撫治荆  
襄流民秋七月乙丑以京師黑青見於禁中祭告天  
地以四事自責壬辰遣使錄天下罪囚八月乙酉罷  
宮中祠玉皇九月己酉妖人李子龍伏誅是月初設  
西廡命太監汪直詞事冬十月戊寅冊貴妃萬氏爲  
皇貴妃

十三年春正月丙午免杭州諸府去年災糧二月丁丑滿都魯亂加思蘭遣使入貢閏二月免山東山西去年災賦三月癸未命法司慎妖言獄戊子免河南去年水災稅糧夏五月丙子罷西廠緝事甲午項忠以病免尋黜爲民是月免鳳陽鞏昌睢諸府州去年災賦六月庚戌復開西廠緝事丁巳商輅致仕秋七月丁卯董方李賓致仕壬申賑京師被水居民辛卯巡撫陝西右副都御史余子俊爲兵部尚書南京右都御史林聰爲刑部尚書是月免福建江西去年災糧八月甲寅遣使賑鳳陽淮安徐兗州饑乙卯免陝

西去年水災稅糧九月庚午免河間災稅壬申逐罷  
閒官吏之匿京師者冬十月戊申城苦峪谷復立峪  
密衛給罕慎土田米布牛種十一月丁卯覈遼東屯田  
戊子禁朝覲官不得與京官往來是月免真定長沙  
災賦十二月戊午湔除内外官過名是月免順天保  
定蘇州松江兗州諸府水災稅糧

十四年春正月免河間及嘉定災糧二月丙午命中  
外軍政五年一考戊申皇太子出閣就學是月免真  
定鳳陽徐去年水災稅糧三月丁丑策試天下貢士  
賜曾彥等三百五十一人進士及第出身有差丙戌

復開遼東馬市丁亥以浙江歲饑罷采花求<sub>是月免</sub>  
河南山東山西浙江去年水災稅糧夏四月壬辰朔  
張瓚擊破松潘疊溪番賊是月免淮安揚州廬州山  
東去年水災稅糧五月壬戌朔免隰永和猗氏去年  
災賦六月丙申免鎮江蘇州太平池州去年災賦癸  
卯中官汪直行遼東邊秋七月丁丑賑畿南及濟南  
諸府水災八月癸巳以畿輔山東水災詔六部條寬  
卹事宜以聞命南京刑部侍郎金紳巡視江西水災  
戊申早朝東班若聞有甲兵聲者皆辟易不成列衛  
士露刃備不虞久之始定因申明朝儀庚戌免湖廣

去年災賦甲寅下巡撫蘇松副都御史牟俸于獄九月己未朔命御史三人捕盜畿南冬十月庚子給京師窮民布十一月壬午免順天陝西災賦十二月己丑發太倉銀三萬兩賑兗州饑壬子湔除內外官過名是月免畿內六府水災稅糧番賊掠松潘境

十五年春正月辛巳發太倉銀三萬兩賑山東是月免鳳陽安慶池州及山東去年災糧二月壬子免廣東被寇逋賦甲寅命修開國勲臣塚墓無後者置守冢一人三月癸未免江西去年災糧夏四月丁亥朔傳陞聽選吏李孜省爲太常寺丞庚戌命直等簡

闕京營軍士是月免應天諸府州去年災賦五月壬戌下兵部侍郎馬文升于獄戊辰年俸謫戍庚午馬文昇謫戍癸酉以年俸馬文升事謫科道官杖給事中李俊御史王濬等五十六人於闕下己卯免河南湖廣災糧秋七月壬戌免山西去年災稅癸酉命汪直行邊八月乙未遣戶部郎中裴慧等巡視兩畿山東河南水災冬十月癸巳揚鼎致仕閏十月乙卯免兗州諸府災稅十一月庚子賑河南饑米二十四萬餘石丁未築寧夏沿河邊牆十二月乙亥鄒幹王復致仕陳鉞爲戶部尚書改掌通政司工部尚書張文



質爲禮部尚書以工部右侍郎劉昭爲尚書是月免  
江西湖廣四川災賦

十六年春正月丁酉命汪直監督軍務王越提督軍  
務朱永充總兵官率京軍萬人禦寇延綏是月免鳳  
陽諸府及山東去年水災稅糧二月寇犯大同寧夏  
延綏丁丑遣使賑保定河間饑庚辰詔修闕里孔子  
廟汪直王越襲寇于威寧海子破之是月免武昌諸  
府及潞城去年災賦三月戊子命光祿寺所徵供御  
物凡被災地悉從減省癸卯禱雨乙巳發太倉米三  
十萬石平價糶之夏四月己卯免慶陽諸府去年災

賦五月丙午免河南去年水災稅糧六月癸戌朔免隴西去年災賦癸丑禁貴戚勢要家侵占民田八月辛酉申存恤孤老之令是秋免順天山東河南福建雲南災稅冬十一月癸卯免順德災糧十二月丙寅寇犯大同命汪直監督軍務同王越朱永馳往禦之是月總督兩廣軍務右都御史朱英總兵官平鄉伯陳政討廣西徭賊破之免長垣諸縣災糧

十七年春正月甲午免畿內去年災賦是月余子俊張文質以憂去二月辛酉通覈天下庫藏出納之數庚午禮部左侍郎周洪謨爲尚書改陳鉞于兵部命

總督倉場戶部尚書翁世資還理部事是月免應天  
鳳陽杭州太原諸府去年災糧三月戊寅以旱霽祭  
告郊社山川戊子策試天下貢士賜王華等二百九  
十八人進士及第出身有差戊戌戴縉爲右都御史  
是月免淮安諸府及山東山西去年災賦夏四月庚  
申久旱風霾諭羣臣修省戊辰中官懷恩同法司慮  
囚五月己亥宣府被寇命汪直監督軍務王越充總  
兵官馳往禦之六月甲辰朔免延安諸府災賦秋七  
月甲戌朔免蘇州松江鎮江去年災賦九月丙戌賜  
京縣窮民布丁酉詔諭安南還占城侵地地十月壬

戊賑河南饑是月免河南山西及烏程諸縣災糧十一月甲申免大名災賦十二月乙丑湔除内外官過名

十八年春正月戊子賑鳳陽淮安饑庚寅劉吉以憂去詔起復丁酉免順天河間保定去年災賦三月壬申復罷西廠甲申免永平災賦乙酉陳鉞罷丙申兵部左侍郎張鵬爲尚書是月賑應天鳳陽淮安蘇州諸府及山西饑夏四月癸丑罕慎復哈密城入居之辛酉禱雨是月免山西及河間去年災賦五月戊寅諭禮部曰廕敘大臣子孫所以崇賢報功示激勸也

果政績顯聞許一子自陳試能通經者聽入監苟容  
身保位無益當時毋或濫授是月免南畿山東去年  
災賦六月免陝西湖廣去年災賦秋七月庚午命副  
都御史程宗勘雲南木邦彛情癸巳賑遼東饑八月  
己酉遣使諭安南與老過八百諸司睦鄰保民毋相  
讐殺癸丑賑畿南及山東饑辛酉免開封諸府去年  
災賦閏八月庚寅林聰卒九月己未免浙江去年災  
賦壬戌刑部左侍郎張瑩爲尚書冬十月甲申免隆  
慶永寧災賦十一月免畿內及慶陽諸府水災稅糧  
十九年春正月癸亥免大同去年水災稅糧二月甲

戊命襄城伯李瑾統軍夫萬人修大慈恩寺辛卯翁  
世資致仕是月免應天鎮江平涼去年災賦三月甲  
辰戴縉爲南京工部尚書丙辰免武昌諸府去年水  
災稅糧夏四月丁丑免河南去年災賦己丑李裕爲  
右都御史五月辛丑免六合江浦去年災糧六月丁  
丑陳政破廣西蠻賊秋七月辛亥余子俊爲戶部尚  
書八月乙丑戶部侍郎李衍刑部侍郎何喬新巡視  
邊關丁卯以寇犯大同命大理少卿侶鍾撫諭保定  
諸府人民壬申汪直有罪斥爲奉御其黨王越戴縉  
等皆坐黜乙亥命中官懷恩及余子俊閱視團營九

月丁巳命應天鎮江太平寧國廣德量加田租冬十二月己巳禱雪乙亥免太原平陽災稅

二十年春正月壬辰以京師地震諭羣臣修省仍命減貢獻罷營造理冤獄寬銀課諸凡事宜條示施行甲寅免順天災稅二月壬申余子俊兼左副都御史總督大同宣府軍務是月免延安大同諸府縣去年災稅三月戊子朔策試天下貢士賜李旻等三百人進士及第出身有差己酉命定西侯蔣琬充總兵官率京軍赴大同宣府禦寇壬子發京軍築宣大邊墩堡夏四月戊午慮囚甲子立殫忠效義二營是月免

薊灤玉田水災稅糧五月甲午囚多訟寃復會官審錄六月庚午初設雲南孟密安撫司乙亥李裕調南京丁丑召朱英還掌院事是月免淮安慶陽諸府水災稅糧秋七月庚寅陝西旱停徵歲辦物料乙未免山東去年災糧八月乙亥勅陝西山西河南鄖陽鎮巡等官撫流亡捕盜賊凡可以安民者聽便宜從事重大者奏聞是月免鳳陽大同諸府去年災糧九月戊子陝西山西大饑人相食開納米事例以賑之辛卯以陝西久旱遣使祭告嶽鎮河海己酉發帑銀三萬兩賑山西饑辛亥免河間災賦是月寇入河套冬



十月丙辰粥度牒於山西陝西度僧道萬人以賑饑  
民丁巳下刑部員外郎林俊及都督府經歷張黻于  
獄詔予杖謫官甲子賜京師窮民布戊辰命總督倉  
場戶部尚書殷謙兼掌部事癸酉罷元江諸府銀坑  
十一月戊戌發帑銀十萬兩轉河南粟五萬石賑陝  
西饑乙巳轉河南粟三萬五千石賑山西饑是月免  
順天山東災賦十二月乙卯再給度牒度僧道七萬  
人賑陝西饑戊午工部侍郎杜謙會河南山東撫按  
官濬河道通漕運辛酉運臨清粟萬五千石賑大名  
順德廣平饑是月免順天河間及山西河南災賦

二十一年春正月丙戌以正旦星變諭羣臣極言時  
政闕失庚寅詔赦天下乙己免保定諸府災賦發京  
倉米一百萬石易銀并帑銀二十五萬兩分遣大臣  
賑陝西河南山西饑二月己未放傳奉文武官五百  
六十餘人是月免陝西去年災稅又免真定襄陽諸  
府災賦三月庚寅開納米例於河南賑饑丁酉禱雨  
夏四月壬戌轉漕米四十萬石賑陝西饑戊辰慮囚  
是月免鳳陽濟南大理諸府去年災賦閏四月辛丑  
張鵬致仕五月辛酉免淮安諸府去年災糧丙子給  
京師流民口糧六月乙己免河間災稅秋七月己己

朱英卒甲戌右副都御史屠瀟爲右都御史九月甲子劉翊罷丙寅慮囚冬十月免河南山西陝西山東災稅又免四川逋賦十一月辛未總督漕運右都御史馬文升爲兵部尚書十二月甲申詹事彭華爲吏部左侍郎兼翰林學士入閣預機務是月免順天蘇州常州平陽澤潞災糧是冬蘭州涼州莊浪鎮番被寇

二十二年春正月乙丑免開封諸府去年災糧是月臨洮被寇二月庚辰免畿南六府去年災賦夏四月戊寅錄囚壬午封金闕真君徐知證爲慈惠高明上

帝玉闕真君徐知諤爲仁惠弘靜上帝丁亥禱雨甲午免鳳陽諸府去年災糧乙未命戶部清釐畿內莊田五月乙丑尹旻罷六月乙亥戒諭文武羣臣省愆修職庚子殷謙致仕是月免應天諸府及陝西災賦秋七月寇犯甘州指揮姚英等被殺八月己丑吏部左侍郎耿裕爲尚書己亥改工部尚書劉昭於戶部以南京右都御史李裕代之是月免保定及徐邳災賦九月丁卯兵部左侍郎尹直爲戶部左侍郎兼翰林院學士入閣預機務改右都御史屠瀟于南京起致仕左副都御史劉敷代之是月免順德及河南廣

東災賦冬十月乙亥慮囚己卯刑部尚書張瑩以憂去以掌大理寺工部尚書杜銘代之庚寅改耿裕於南京禮部以李裕代之禮部右侍郎謝一夔爲工部尚書丁酉復建大護國永昌寺十一月免保定鳳陽諸府州災賦十二月癸酉劉昭罷是月免順天吉安梧州諸府災賦

二十三年春正月辛亥皇貴妃萬氏薨辛酉命屠瀟慰諭占城國王古來戊辰以總督漕運左副都御史李敏爲戶部尚書致仕左都御史余子俊爲兵部尚書是月免真定西安長沙諸府去年災賦二月甲戌

免鎮江去年災賦乙酉命副都御史邊鏞通政使叅  
議田景賢巡視大同諸處邊務三月丁未彭華致仕  
戊申賑福州饑乙卯策試天下貢士賜費宏等三百  
四十九人進士及第出身有差癸亥免山東去年災  
賦夏四月乙亥免台州諸府災糧庚辰慮囚丁酉禱  
雨五月丙辰勅羣臣修省戊午謝一夔卒六月己巳  
朔朶顏三衛爲那孩等驅掠逃入遼東塞內命暫於  
近邊住牧有饑窘者量給米布賑之是月免鳳陽西  
安諸府災賦秋七月戊申封皇子祐杭爲興王祐楡  
岐王祐檟益王祐樺衡王祐檉雍王八月庚辰帝不

豫乙酉命皇太子暫視朝于文華殿乙丑崩年四十  
一九月乙卯上尊諡曰繼天凝道誠明仁敬宗文肅  
武宏德聖孝純皇帝十二月壬午葬茂陵

論曰帝在位二十餘年災沴見告無虛日而修省補  
救亦未以爲患蓋其時在重熙之後也乃一二妖僧  
方士居然竊弄太阿西廠之設傳奉之濫尤關後世  
之覺竇君子於此誠不能無譏焉然而景泰封沂之  
隙帝則畧不以介意一旦追崇尊號褒卹舊拒體先  
皇之志毅然行之以快中外之人心其舉動之善豈  
不度越於尋常萬萬哉若帝者真可謂善於繼述者

矣